

Lij Soujhan: Gizcangj、Yaucangj、Fwenvuengz、Yozcej

李守汉：局长、校长、歌王、学者

□ Hoz Cunghveih raiz Dahdingz hoiz

De gonqlaeng dang donzcangj vwnzgunghdonz、gizcangj gyauyuzgiz、gizcangj vwnzvagiz、yaucangj minzczunghyoz gvaq; de dwg bouxveiyenz Cungguk Minzczu Yisuzgyah Yozvei, Guekgya Minzczu Yisuzgyah Yozvei soengq hawj de aen cwnghueh minzczu yisuzgyah maenh'ak, Aen Hezvei Fwen Guengjsae soengq hawj de aen cwnghueh fwenvuengz ndaw-biengz; de gonqlaeng okbanj cucoz hungmbwk Bouxcuengh 《Seiq Daih Fwencieg Bouxcuengh》daengj cibgeij cek conhcu yozsuz gyaciz gig sang raiz vwnzva Bouxcuengh haenx, cozbij lai dangqmaz, youq aen lingjyiz yenzgiu vwnzva vwnzyoz Bouxcuengh miz mingzdaeuz gig hung.

De couhdlg Sanglinz Yen Gyauyuzgiz boux nyuenz gizcangj Lij Soujhan, vwnzgeq bi'ndwen ndaej 84 bi, guh hong vwnzva saehnieb、daengx ciuhvunz gvansim saehnieb Sawcuengh, duiyoh gvaqlaeng 20 bi lij youq aen lingjyiz vwnzva Bouxcuengh haengrengz buekguh, daengz seizneix vunzlai lij haengj heuh de guh Lij gizcangj.

Giet yienz Sawcuengh, youq bi 1958 baez raen couh maij

Lij Soujhan daj seng okdaeuj couh gig gyaemaij vwnzva Bouxcuengh, cijaeu gangj daengz Bouxcuengh、Sawcuengh、Fwenvuengh、Heiqcuengh daengj doenghgij saehcingz caeuq vwnzva Bouxcuengh mizgven neix, de cungj haeujyinx dangqmaz, caemhcaiq seizbienh couh gangj ndaej ok haujlai gojgaeq mizyinx caeuq de doxgven haenx.

Doiq gij goekgaen caeuq gij hwngfat Sawcuengh, Lij Soujhan couh lumj suenq gij bauj ndawranz bonjfaenh nei. De naeuz, bi 1957 ndwen 11 Gozvuyen cingqisik baecinj 《Fueng'anq Sawcuengh》, youq dieg Bouxcuengh hainduj doihengz yungh, seizhaenx vunzlai aeu hag Sawcuengh dangguh aen cwngeci yinvu ndeu, hag Sawcuengh yungh Sawcuengh youq mwhhaenx caen dwg hoenghghwd, Guengjsae gak dieg caezgya hainduj laebguh hagdangz Sawcuengh, aeu daeuj son'gyauq ganbu Sawcuengh caeuq lauxsae Sawcuengh.

Bi 1958, Lij Soujhan lij dwg Sanglinz Yen boux yaucangj siujyoz ndeu, mwh de rox aen siusik neix le couh bauqmingz bae hag, aenvih bonjfaenh dwg vunz Bouxcuengh, vahcoj couhdlg Vahcuengh, ndigah hag geij ngoenz couh hag rox Sawcuengh lo. Hoeng, ndwenngoenz ndei gvaq ndaej gig vaiq, “Vwnzva Da Gwzming” hainduj le, gij hong doihengz Sawcuengh couh deng bik daengx roengzdaeuj lo.

Mbaq rap song faenh hong, cujyin minzyijban caeuq yaucangj hagdangz Sawcuengh

Daj bi 1980 dauqfuk Swcigih Minzyijvej le, gak dieg、si、yienh hix

laebdaeb dauqfuk aen gihgou guh hong Vahcuengh Sawcuengh. Mwhhaenx, Lij Soujhan youq Sanglinz Yen Gyauyuzgiz dang gizcangj. Bi 1986, Minzyijban Sanglinz Yen laebbaenz, Lij Soujhan aenvih naengzlig ak ndaej dang boux cujyin de.

Aen yinvu daih'it minzyijban laebbaenz le dwg laebguh hagdangz Sawcuengh, caenhliengh vaiq son-gyauq ok lauxsae Sawcuengh habgek, riengzlaeng aeu Sawcuengh doigvangq daengz siujyoz. Guh boux yaucangj hagdangz Sawcuengh iugouz gig sang, daih'it aeu rox Sawcuengh, daihngieh aeu rox sonhag, daihsam aeu dang lingjdauj gyauyuz bouhmonz gvaq. Ra doh daengx aen yienh Sanglinz, cij miz boux dog habgek, youh dwg Lij Soujhan! Mbaq rap song faenh hong, dan lingx faenh cienzhong ndeu, youq mwh giepniox vunzcaiz、youq laj maqmuengh lingjdauj ndaw yienh, Lij Soujhan hix cieq gvaq dang yaucangj faenh hong neix lo! Cwngeci dieg、hwnq hagdangz, ciu ra vunzcaiz, Hagdangz Sawcuengh Sanglinz Yen ciuq seiz ciuq caetliengh guh hwnjdaeuj lo, Lij Soujhan buet hwnj buet roengz, hwnz ngoenz mbouj yiet, son'gyauq ok baenz buek baenz buek hagseng maenhndei, vih haujlai aen siujyoz dieg sawq son Sawcuengh haenx soengqbae lauxsae Sawcuengh habgek.

Gangj saedsaeh, daezok gij vunqsik sonhag “aeu Cuengh coi Gun”

Minzyijban Sanglinz Yen laebbaenz caeuq Hagdangz Sawcuengh Sanglinz Yen hainduj miz cujiz hai guh le, gij hong doigvangq Sawcuengh Sanglinz Yen aeundaej hwngfat gig vaiq, hag Sawcuengh hix hainduj haeujdaengz siujyoz gyauyuz.

Hoeng, mwh youq ndaw siujyoz guh sawq son sawq doigvangq Sawcuengh, haujlai bohranz couh mbouj haengj hawj lwgnyez bonjfaenh hag Sawcuengh, gyoengqde nyinhnaeuz hag Sawcuengh mbouj miz yungh, engqlij miz vunz goenghai fanjdui, naeuz hag Sawcuengh dwg cungj doiqdauq ndeu; miz mbangj bohranz nyinhnaeuz, hag rox Sawcuengh lij aeu hag rox Sawgun dem, mboujnex daengzcog mboujlnh siengi guh gijmaz byaij saek yamq cungj hoj, mboujyawx cigsoh hag Sawgun, hag Sawcuengh dwg sai seizgan daengxndwi.

Lij Soujhan dang lauxsae gvaq, dang gizcangj gyauyuzgiz gvaq, youq gyauyuz fuengmienh de dwg boux cien'gya caixhangz ndeu, mwh de haeujlaeg saedcaeq bae roxyiuj gij you gyoengq bohranz le, mbouj lawq saekdi dwk daezok sawq bae “aeu Cuengh coi Gun”. “Aeu Cuengh coi Gun” couhdlg, hawj hagseng iq Bouxcuengh daj it nienzgaep hainduj hag Sawcuengh caeuq Sawgun, yungh duenh seizgan ndeu bae hag

Sawcuengh gonq, caj gyoengqde rox gyoep、rox doeg、rox raiz Sawcuengh le, couh hainduj bae hag Sawgun.

Daj guh gvaq cwnghmingz, Lij Soujhan sawq “aeu Cuengh coi Gun” sonhag caen deng, miz gij giekdaj hag Sawcuengh le, gyoengq hagseng hag Sawgun hag ndaej haemq vaiq, gij suiijingz Vahgun hagseng ndaw aenban siujyoz sawq sonhag Sawcuengh haenx caeuq aenban Sawgun nienzgaep doxdoengz haenx doxbeij gij cingzcik de miz ndei gvaq mbouj miz yaez gvaq. Vihneix, “aeu Cuengh coi Gun” daj sawq son swngsang baenz gij vunqsik baenzgoeng, caemhcaiq gig vaiq couh youq daengx gih gak dieg doigvangq hwnjdaeuj.

Dinfwngz aeu cing, haengrengz doi vunzcaiz Sawcuengh cienmonz guh hong ciennieb

Youq mwh gij vunqsik “aeu Cuengh coi Gun” hoenghghwd haiguh hwnjdaeuj, gij vwndiz moq okdaeuj lo. Doigvangq Sawcuengh dwg minzyijban guenj, hoeng, siujyoz gyauyuz cix dwg gyauyuz bouhmonz guenj, minzyijban caeuq gyauyuz bouhmonz gag guh gij hong bonjfaenh, ciengzseiz dwg, minzyijban siengi aeu lauxsae maenhndei yungh youq gwnz gij hong sonhag Sawcuengh, hoeng, gyauyuzgiz cungj mbouj haengj cuengq vunz, doeklaeng dauqfanj cungjdwg lauxsae gig bingz-ciengz bae son Sawcuengh.

Aenvih lauxsae mbouj maenhak、engqlij miz mbangj lauxsae mbouj habgek, caenhguenj gij vunqsik sonhag Sawcuengh “aeu Cuengh coi Gun” gig ndei, gij caetliengh sonhag ndaw aenban siujyoz sawq son Sawcuengh doeklaeng lijdwg okyienh gij cingzgvang sang daemq mbouj caez, aenban song vawsaw lawz lauxsae maenhndei bae son cingzeik couh ndei, aenban song vah saw lauxsae bingzciengz bae son haenx cingzcik couh miz di ca.

Lij Soujhan rox, yaek gaijbienq cungj cingzgvang neix, aen banhfap dog couhdlg aeu gij hong Sawcuengh haeuj hagdangz gyau hawj gyauyuz bouhmonz guenjeix. Lij Soujhan ndawsim rox, neix dwg diuz roen hoj gvaq hwnj mbwn ndeu, gij saeh neix gaenq mbouj dwg de guenj ndaej daengz lo. Hoeng, vihliux saehnieb Sawcuengh, de roengz gietsim aeu byaij daengz daej. Vihneix, de lai baez baedauq Namzningz caeuq Sanglinz, ra Swcigih Minzyijvej、ra lingjdauj, engqlij ra daengz Swcigih Cwnghfuj Cangh Swnghcin boux fucujis baenguenj Sawcuengh neix, aeu saedsaeh gangjavah, aeu anqlaeh gangjavah, aeu gij cingzgvang baihlaj baenz diuz baenz diuz bauqlwnh hawj lingjdauj bouhmonz gaep baihgwnz.

Bi 1988, Hagdangz Sawcuengh Sanglinz gaij baenz Minzczu Cunghyoz, caemhcaiq gyau hawj gyauyuz bouhmonz cawjguenj, Lij Soujhan hix

daj yaucangj Hagdangz Sawcuengh bienqbaenz yaucangj Sanglinz Minzczu Cunghyoz, mwhhaenx, de gaenq ca mbouj geijlai couh daengz bi'ndwen duiyoh lo. Minzczu Cunghyoz gyau hawj gyauyuz bouhmonz guenjeix le, naengzlig lauxsae ndaej gyaak haujlai, sonhag Cuengh Gun hix ndaejdaengz doengzbouh hwngfat. Siujyoz Sawcuengh gyauyuz hwngfat hix caeuq neix doxlumj.

Goengfou mbouj nguh boux miz sim. Doeklaeng gaep baihgwnz gietdingh, daj bi 1990 ndwen 6 hainduj, gij hong Sawcuengh haeuj hagdangz cienj gyau hawj gyauyuz hingzcwng bouhmonz guenjeix, youq gwnz diuzroen doigvangq Sawcuengh, Lij Soujhan ndaej raiz roengz bit naeknaek ndeu.

Cucoz daihbaj, duiyoh 20 bi gonjbit ndaw fwngz caengz daengx gvaq

Gij ginglig guhhong Lij Soujhan gig genjdanh: Lij Soujhan, sai, Bouxcuengh, bi 1933 okseng, bi 1953 swhfan bizyez camgya guhhong, bi 1994 duiyoh. Dang gvaq donzcangj vwnzgunghdonz、gizcangj gyauyuzgiz、gizcangj vwnzvagiz、cujyin minzyijban、yaucangj hagdangz Sawcuengh、yaucangj minzczu cunghyoz Sanglinz Yen daengj.

Duiyoh le, gij gungyen de vih vwnzva Bouxcuengh guh'ok haenx cix lai dangqmaz.

De gonqlaeng youq gwnz 《Guengjsae Yizbau》《Sam Nyied Sam》《Guengjsae Minzczu Bau》daengj doenghgij bauqceij ganhvuz neix fatbiuj gvaq ca mbouj geijlai 100 hot fwen Bouxcuengh.

《Ginghci Lajmbanj Haeuj Hawciengz》hot fwen bi 1993 raiz neix, aeundaej ciengfatbiuj ciet fwen Guengjsae gaiq daih'it.

《Go Ndaem Oij Nuengx Ndaem Naz》hot fwen Vahcuengh bi 2006 bien raiz neix camgya Namzningz Si fwen yenzswnghdai doxdax aeundaej it daengciengj.

De gonqlaeng okbanj cibgeij cek conhcu raiz vwnzva Bouxcuengh, ndawde bouhsaw 《Seiq Daih Fwencieg Bouxcuengh》bi 2015 youz Guengjsae Minzczu Cuzbanjse okbanj neix, dwg bouh conhcu vwnzva Bouxcuengh yozsuz gyaciz gig sang ndeu. 《Seiq Daih Fwencieg Bouxcuengh (Hoizgej)》souloeg miz 《Fwen Lwgswnh》《Fwen Daegbeix》《Fwen Daeggyap》《Fwen Mehyou》daengj seiq aen heiqbeihgi ginghdenj Bouxcuengh, yungh gij hingzsis fwen Bouxcuengh yienjciengq geiqloeg.

Icig daengz bi 2016, de lij cawjbien le 《Saw Comz Fwen Yenzswnghdai Sanglinz Fwenyoux Sanglinz》, gangj ndaej hwnj cucoz lai baenz dong, youq aen lingjyiz yenzgiu vwnzva vwnzyoz Bouxcuengh miz mingzdaeuz gig hung.